

四庫全書

子部

欽定四庫全書

冊府元龜卷八百五十一 宋 王欽若等撰

總錄部

友悌

詩曰因心則友傳曰兄良弟悌史佚有致美之論小雅形莫如之歎蓋孝友之德通於神明而為民極矣中古已降遺文可覲乃有臨難而爭死傭耕以給養割天性之愛全猶子之單緒銜死喪之戚棄仕籍而長徃分財

讓爵正家睦族遠跡兆寵推致於天倫克已紓禍全度
於世難至乃字育孤幼養治疴瘵恭順兼極勞苦無憚
脊令急難之義以之而彰墳笮和樂之美於是乎在孔
子曰孝悌也者其為人之本與信君子之所務也已
衛公子壽宣公之子太子伋之異母弟而子朔之兄也
宣公欲廢太子伋而立子朔乃使太子伋於齊而令盜
遮界上殺之與太子白旄而告界盜見持白旄者殺之
且行壽知朔之惡太子而君欲殺之乃謂太子曰界盜

見太子白旄即殺太子可毋行太子曰逆父命求生不可遂行壽見太子不止乃盜白旄而先馳至界盜見其驗即殺之壽已死而太子伋又至謂盜曰所當殺乃我也盜并殺太子伋衛人傷而作二子乘舟之詩

仲由字子路有姊之喪可以除之矣而弗除也孔子曰何弗除也子路曰吾寡兄弟而弗忍也孔子曰先王制禮行道之人皆弗忍也子路聞之遂除之

趙旃為晉大夫晉楚戰於邲晉師敗旃以其良馬二濟

其兄與叔父以他馬反遇敵不能去棄車而走林中

趙盾父衰娶狄女叔隗之所生也文公妻衰生原同屏

括樓嬰

原屏樓三子之邑

趙姬以盾為賢請於公以為嫡子後

盾為卿請以括為公族

括趙盾異母弟趙姬之中子屏季也

曰姬氏之愛

子也

趙姬文公女成公姊也

微君姬氏則臣狄人也成公許之

盾狄

外孫也姬氏逆之以為嫡

趙盾益旄車之族

旄車當為公行之官盾本卿適其于公族辟屏

季故更

使屏季以其故旄為公族大夫

漢陳伯有田三十畝與弟平居伯常耕田縱平使游學

為人長大美色人或謂平貧何食而肥若是其嫂疾平

之不親家生產曰亦食糠覈耳

覈麥糠中不破者京師人謂麤屑為統頓

有

叔如此不如無有伯聞之遂棄其婦

伯平之兄也史不載官位

卜式河南人以田畜為事有少弟弟壯式脫身出

脫身謂引

身出也獨取畜羊百餘田宅財物盡與弟式入山牧十餘

年羊致千餘頭買田宅而弟盡破其產式輒復分與弟者數矣後代石慶為御史大夫

王商涿郡人商父封平昌侯商少為太子中庶子以肅

敬敦厚稱父薨商嗣為侯推財以分異母諸弟身無所受

金敬成帝時為衛尉病甚使使者問所欲以弟岑為托

帝召岑拜為使主客

官名屬鴻臚主胡客也

後漢杜林王莽末客河西弟成物故隗囂聽林持喪東歸既遣而悔追令刺客楊賢於隴坻遮殺之賢見林身推鹿車載致弟喪乃歎曰當今之世誰能行義我雖小人何忍殺義士因亡去建武中為光祿代朱浮為大司

空

淳于恭王莽末歲饑兵起恭兄崇將為盜所烹恭請代
得俱免後崇卒恭養孤幼教誨學問有不如法輒反用
杖自箠以感悟之兒慙而改過遷侍中騎都尉

馬援兄况卒援行服暮年不離墓所敬事寡嫂不冠不
入廬位伏波將軍

虞延王莽末天下大亂延嘗嬰甲冑擁衛親族扞禦鈔
盜賴其全者甚衆延從女弟年在孩乳其母不能活之

棄於溝中延聞其號聲哀而收之養至成人以妻同縣人王氏建武初除細陽令

郭昌光武郭后之父讓田宅財產數百萬與異母弟國人異之昌追封陽安侯

趙孝字長平沛國人及天下亂人相食孝弟禮為餓賊所得孝聞之即自縛詣賊曰禮久餓羸瘦不如孝肥飽賊大驚並放之後孝徵拜諫議大夫禮徵為御史中丞劉平本名曠楚郡人更始時天下亂平弟仲為賊所殺

其後賊復忽然而至平援侍其母奔走逃難仲遺腹女始一歲平抱仲女而棄其子母卻還取之平不聽曰力不能兩活仲不可絕類遂去不顧後遷侍中拜宗正王琳汝南人年十餘歲喪父母因遭大亂弟季出遇赤眉將為所脯琳自縛請先季死賊矜而放遣繇是顯名鄉邑後司徒府薦士而退

兒萌字子明齊國人車成字子威梁郡人二人兄弟竝見執於赤眉將食萌成叩頭乞以身代賊亦哀而兩釋

馬史不載官位

繆彤汝南召陵人少孤兄弟四人皆同財業及各娶妻
諸婦遂求分異又數有爭鬪之言彤深懷忿歎乃掩戶
自槌曰繆彤汝修身謹行學聖人之法將以齊整風俗
奈何不能正其家乎弟及諸婦聞之悉叩頭謝罪遂更
為敦睦之行卒中牟令

魏霸世有禮義霸少喪親兄弟同居州里慕其雍和為
光祿大夫卒於官

魯恭與弟丕俱居太學恭憐丕少欲先就其名托疾不仕郡數以禮請謝不肯應母強遣之恭不得已而西因留新豐教授建初中丕舉方正恭乃初始為郡吏

薛苞父母死弟子求財異居苞不能止乃中分其財奴婢引其老者曰與我共事久若不能使也田廬取其荒頓者曰吾少時所理意所戀也器物取朽敗者曰我素所服食身口所安也弟子數破其產輒復賑給建光中公車徵至拜侍中

楊厚母初與前妻子搏不相安厚年九歲思令和親乃託疾不言不食母知其旨瞿然改意思養加篤安帝永初二年除中郎

孔奮扶風人為武都太守弟竒游學雒陽奮以竒經明當仕上病去官守約鄉閭

樊梵字文高長羅侯宏之孫為郎二十餘年三署服其重慎有孫悉推財物二千餘萬與孤兄子

樊準宏之族曾孫少勵志行修儒術以先父產業數百

萬讓孤兒子為光祿勳卒於官

陰興子慶封鮦陽侯推田宅財物悉與弟員丹明帝以慶義讓擢為黃門侍郎

李充字太遜陳留人也家貧兄弟六人同衣共食妻竊謂充曰今貧居如此難以久安妾有私財願思分異充偽酬之曰如欲別居當釀酒具會請呼鄉里內外共議其事婦從充置酒讌客充於坐中前跪白母曰此婦人無狀而教充離間母兄罪合遣斥便呵叱其婦遂令出門婦

銜涕而去坐中驚肅因遂罷散後遷左中郎將

韓稜四歲而孤養母弟以孝友稱及壯推先父餘財數百萬與從昆弟鄉里高之後至司空

張堪字君游南陽宛人為郡族姓堪早孤讓先父餘財數百萬與兄子後至漁陽太守

封觀有志節當舉孝廉以兄名位未顯恥先受之遂稱風疾喑不能言火起觀屋徐出避之忍而不告後數年兄得舉觀乃稱推而仕郡焉

許武會稽陽羨人也太守第五倫舉為孝廉武以二弟
晏普未顯欲令成名乃請之曰禮有分異之義家有別
居之道於是共割財產以為二分武自取肥田廣宅奴
婢强者二弟所得並悉劣少鄉人皆稱弟克讓而鄙武
貪婪晏等以此竝得選舉武乃會宗親泣曰吾為兄不
肖盜聲竊位二弟年長未豫榮祿所以求得分財自取
大譏今理產所增三倍於前悉以推二弟一無所留於
是郡中翕然遠近稱之位至長樂少府

許荆武孫也少為郡吏兄子世嘗報讐殺人怨者操兵
攻之荆聞乃出門逆怨者跪而言曰世前無狀相犯咎
皆在荆不能訓導兄既早沒一子為嗣如何令死者傷
其滅絕願殺身代之怨家扶荆起曰許掾郡中稱賢吾
何敢相侵因遂委去荆名譽益著卒諫議大夫

姜肱字伯淮彭城廣戚人也家世名族肱與二弟仲海
季江俱以孝行著聞其友愛天至嘗共卧起及各娶妻
兄弟相戀不能別寢以係嗣當立乃遽往就室嘗季江

謁郡夜於道遇盜欲殺之肱兄弟更相爭死賊遂兩釋

焉

謝承書曰肱與季江俱乘車行適野廬為賊所劫取其衣物欲殺其兄弟肱謂盜曰弟年幼父母所憐慙

又未娶願自殺身濟弟季江言兄年德在前家之珍寶國之英俊乞自戮以代兄命盜賊乃曰二君所謂賢人吾等不良妄相侵犯棄物而走即拜大中大夫伏竄青州

鍾皓潁川人少以篤行稱公府連辟為二兄未仕避隱

密山

密縣山也

後辟司徒府自劾去

第五訪倫之族孫也少孤貧嘗傭耕以養兄嫂有閒暇則以學文拜護羌太尉卒於官

崔駟家貧兄弟同居數十年鄉邑化之後至長岑長

孔融魯國人也山陽郡東部督郵張儉以忠正為中常侍侯覽所忿疾覽為刊章下州郡捕儉儉與融兄裒有舊亡投裒時值裒出融年十六儉以其少不告也融知儉長者有窘迫色謂曰吾獨不能為君主邪因畱舍藏之後事泄國相以下密就掩捕儉得脫走登時收融及裒送獄融曰保納藏舍者融當坐之裒曰彼來求我罪我之繇非弟之過我當坐之兄弟爭死郡縣疑不能決

乃上獻詔書令哀坐焉融繇是名震遠近後至中大夫
童恢弟翊字漢文名高於恢宰府元辟之翊陽嗜不肯
仕及恢被命乃就孝廉

陳重為細陽令政有異化舉尤異嘗遷為會稽太守遭
姊憂去官

譙玄遷大常以弟服去職

魏張範之子陵及弟承子戩為山東賊所得範直詣賊
請二子賊以陵還範範謝曰諸君相還兒厚矣夫人情

雖愛其子然吾憐戩之小請以陵易之賊義其言悉以還範初為議郎叅丞相軍事

韓珩字子佩代郡人清粹有雅量少喪父母奉養兄姊宗族稱孝悌焉為袁譚別駕

吳孫賁字伯陽父羌字聖壹堅同產兄也賁早失二親弟甫嬰孩賁自贍育友愛甚篤為郡督郵

舒仲膺兄伯膺親友為人所殺仲膺為報怨事覺兄弟爭死皆得免

晉王覽字通玄與兄祥異生覽母朱氏遇祥無道覽年數歲見祥被楚撻輒涕泣抱持至於成童每諫其母少止凶虐朱屢以非理使祥覽與祥俱又虐使祥妻覽妻亦趨而共之朱患之乃止祥喪父之後漸有時譽朱深疾之密使酖祥覽知之徑起取酒祥疑其有毒爭而不與朱遽奪反之自後朱賜祥饌覽輒先嘗朱懼覽致斃遂止覽孝友恭恪名亞於祥以大中大夫歸老

高光字宣茂少習家業明練法理武帝時為廷尉其兄

誕放率不倫而決烈過人與光異操謂光小節常輕侮之而光事誕愈謹

高崧字茂琰撫幼弟以友愛稱累遷侍中

江道字道載陳留圉人少孤與從弟灌共居甚相友悌繇是獲當時之譽仕至太常

王徽之與獻之俱病篤時有術人云人命應終而有生人樂代者則死者可生徽之謂曰吾才位不如弟請以餘年代之術者曰代死者以已年有餘爾今君與弟算

俱盡何代也未幾獻之卒微之奔喪不哭直上靈牀坐
取獻之琴彈之久而不調歎曰嗚呼子敬人琴俱亡因
頓絕先有背疾遂潰裂月餘亦卒仕至黃門侍郎

吳隱之轉征虜叅軍事兄坦之為袁真功曹真敗將及
禍隱之詣桓溫及乞代兄命溫矜而釋之遂為溫所知
賞仕至光祿勳

庾袞叔褒咸寧中大疫二兄俱亡次兄毗復殆癘氣方
熾父母諸弟皆出次於外袞獨畱不去諸父兄強之乃

曰衮性不畏病遂親自扶侍晝夜不眠其間復撫柩哀臨不輟如此十有餘旬疫勢既歇家人乃反毗病得瘥衮亦無恙父老咸曰異哉此子守人所不能行歲寒然後知松柏之後凋始疑疫癘不相染也州郡交命察孝廉舉秀才清白異行皆不降志世遂號為異行者也

孫晷兄嘗篤疾經年晷躬自扶持侍藥石甘苦必經心因跋涉山水祈求懇至州府辟並不就

顏含字弘都瑯琊華人汝陰太守黜之子少有操行以

孝聞兄畿咸寧中得疾就醫自遼遂死於醫家家人迎喪旒每繞樹而不可解引喪者顛仆稱畿言曰我壽命未死但服藥太多傷我五臟爾今當復活慎毋葬也其父祝之曰若爾有命復生豈非骨肉所願今但欲還家不爾葬也旒乃還其婦夢之曰吾當復生可急開棺婦頗說之其母及家人又夢之即欲開棺而父不聽含時尚少乃慷慨曰非常之事古則有之今靈異至此開棺之痛孰與不開相負父母從之乃共發棺果有生驗以

手刮棺指爪盡傷然氣息甚微存亡不分矣飲哺將護累月猶不能語飲食所須托之以夢闔家營視頓廢生業雖在母妻不能無倦矣含乃絕棄人事躬親侍養足不出戶者十有三年石崇重含淳行贈以甘旨含謝而不受或問其故答曰病者綿昧生理未全既不能取噉又未識人患若當謬留豈施者之意也畿竟不起含後至光祿勳年老遜位

李重字茂曾少好學有文辭早孤與羣弟居以友愛著

稱

裴嶷為滎陽太守屬天下亂嶷兄武先為玄菟太守嶷
遂求為昌黎太守至郡久之武卒嶷被徵乃將武子開
送喪俱南

祖約豫州刺史逖之弟初以孝廉為成臯令與逖甚相
友愛

孔巖為吳興太守時武康有兄弟二人妻各有孕弟遠
行未反遇荒歲不能兩全棄其子而活弟子

謝玄以功封康樂縣公力請以先封東興侯賜兄子玩
詔聽之更封玩豫寧伯

杜烈為衡陽太守聞兄軫亡因自表兄子幼弱求去官
詔轉健為太守蜀士榮之

鄧攸沒于石勒勒過泗水攸乃研壞車以牛馬負妻子
而逃又遇賊掠其牛馬步走擔其子而及其弟子餒甚
度不能兩全乃謂其妻曰吾弟早亡惟有一息理不可
絕止應自棄我兒爾幸而得存我後當有子妻泣而從

之乃棄其子朝棄而暮及明日又繫之于樹而去攸仕
至尚書右僕射

周顛少有重名顛性寬裕而友愛過人從弟穆亦有美
譽欲陵折顛顛陶然弗與之較又弟嵩嘗因酒瞋目謂
顛曰君才不及弟何乃橫得重名以所然蠟燭投之顛
神色無忤徐曰阿奴火攻固出下策爾後終尚書左僕
射

徐苗性抗烈輕財貴義有知人之鑒弟患口癰膿潰苗

為吮之其兄弟皆早亡撫養孤遺慈愛聞于州里田宅
奴婢盡推與之郡察孝廉州辟從事治中別駕舉異行
公府五辟博士竝不就

謝尚字仁祖豫章太守鯤之子幼有至性七歲喪兄哀
慟過禮親戚異之

宋檀道濟少孤居喪備禮奉姊事兄以和謹致稱位司
空將軍

張暢弟牧嘗為獠犬所傷醫者云食蝦蟇膾可療牧難

之暢含笑先嘗牧因此乃食繇是遂愈位侍中卒會稽太守

胡藩字道序州府辟召不就須二弟冠婚畢乃叅郝恢征虜軍事

謝述景仁之弟也景仁愛其第三弟尠而憎述嘗設饌請高祖命尠豫坐而高祖召述述知景仁夙意又慮高祖命之請急不從高祖馳遣呼述須至乃嘆及景仁有疾述盡心營視湯藥飲食必嘗而後進不解帶不冠櫛

者累旬景仁深懷感愧元嘉二年徵拜中書侍郎

蔡廓為祠部尚書奉兄軌如父家事大小皆諮而後行
公祿賞賜皆以入軌每有所資須悉就典者請焉從高
祖在彭城妻郗氏書求夏服廓答書知須夏服計給事
自應相供無容別寄時軌為給事中

杜驥為寧遠將軍青冀二州刺史徵左軍將軍弟坦代
為刺史坦長子琬為散騎侍郎太祖嘗有函詔勅坦琬
輒開視信未發又追取之勅函已發大相推簡承都答

云諸郎開視帝遣王書詰責驥答曰開函是臣第四子
季文伏待刑坐帝特原不問

蔣恭義興臨津人晉陵蔣崇平為劫見擒去與恭妻弟
吳晞張為侶晞張先行不在本村遇水晞張妻及息告
避水移寄恭家討錄晞張不獲收恭及兄協治罪恭協
並款住舍晞張家口而不知劫情恭列晞張妻息是婦
之親今有罪恭身甘分求遣兄協協曰協是戶主廷制
所繇有罪之日關協而已求遣弟恭兄弟二人爭求受

罪郡縣不能判依事上詳州義之曰禮讓者以義為先
自厚者以利為上末世俗薄靡不自私伏膺聖教猶或
不逮況在野夫未達誥訓而能互發天倫之愛甘受莫
測之罪若斯情義實為殊特蔑爾恭協而能行之茲乃
經古之所希盛世之嘉事二子乘舟無以過此豈宜拘
執憲文加以罪戮且晞張封簡遠行他界為劫造釁自
外贓不還家所寓村伍容或不知亦不合罪勒縣遣還
復民伍除恭義成令協義怡令

謝弘微居身清約器服不華而飲食滋味盡其豐美兄
曜卒弘微蔬食積時哀感過禮服雖除猶不啜魚肉沙
門釋慧琳詣弘微弘微與之共食猶獨蔬素慧琳曰檀
越素既多疾頃者肌色微損即吉之後未復膳羞以無
益傷生豈所望於得理弘微答曰衣冠之變禮不可踰
在心之哀實未能已遂廢食感咽歔歔不自勝弘微少
孤事兄如父兄弟友穆之至舉世莫能及也位至吏部

尚書

江智淵兄子樞早孤養之如子

王徽弟僧謙有才譽為太子舍人遇疾徽躬自處治而僧謙服藥失度遂卒徽深自咎恨發病不復自治僧謙卒後四旬徽終

沈雍之與兄攸之異生諸弟中性和謹尤見親愛攸之性儉嗔子弟不得妄用財物惟恣雍之所須輒取齊中服飾分與親舊以此為常終鎮西將軍荊州刺史

徐湛之年數歲與弟淳之共車行牛奔車壞左右人馳

來赴之湛之先令取弟衆咸歎其幼而有識終吏部尚書

庾彥達為益州刺史攜姊之鎮分祿秩之半以供贍西土稱焉

劉秀之兄欽之為朱齡石右軍叅軍隨齡石敗沒秀之哀戚不歡宴者十年

關康之弟雙之病卒迎哀因得虛勞病寢頓二十餘年時有間日輒卧論文義元嘉中詔徵不起

戴顓字仲若譙郡銍人與兄勃遊桐廬名山因畱居止
勃疾患醫藥不給顓曰隨兄得閒非有心於語默兄今
疾篤無可治療顓當干祿以自濟取乃求虞海令事垂
行而勃卒乃止元嘉初累徵不就

張欣泰父興世罷雍州在家還資見錢三十萬蒼梧王
自領人劫之一夜垂盡興世憂懼感病卒欣泰兄欣華
時任安成郡欣泰悉封餘財以待之

江秉之字玄叔濟陽考城人給事中纂之子少孤弟妹

七人並皆幼稚撫育姻娶罄其心力累遷新安臨海太守

王華為侍中有權寵以門戶衰弱待從弟琨如親數相親薦為尚書議曹郎

王僧虔兄僧綽為元凶所害親賓咸勸僧虔逃僧虔涕泣曰吾兄奉國以忠貞撫我以慈愛今日之事若不見及爾若同歸九泉猶羽化也孝武初出為武陵太守兄子儉於中途得病僧虔為廢寢食同行客慰喻之僧虔

曰昔馬援處兒姪之間一情不異鄧攸為弟子更逾所
生吾實懷其心誠未異古亡兄之嗣不宜忽諸若此兒
不救便當迴舟謝職無復遊宦之心矣

崔懷慎泰始初以父陷於魏遂入北至桑乾尋父已卒
喪畢以弟在南又逃歸而弟亦已亡懷慎孤貧獨立宗
黨哀之不載官位

虞愿為中書郎領東觀祭酒兄季為上虞令卒愿徙省
步還家而待詔便歸

孫棘彭城人也世祖大明五年發三五丁弟薩應充行
坐違期不至依制軍法人身付獄未及結棘竟詣郡辭
不忍令當一門之苦乞以身代薩薩又辭列門戶不逮
罪應至此狂愚犯法實是薩身也應依法受戮兄弟少
孤薩三歲失父一生恃賴惟在長兄雖可垂愍有何心
處世太守張岱疑其不實以棘薩各置一處語棘云已
為詔詳聽其相代棘顏色甚悅答云得爾旦則為死又
語薩亦欣然曰死自分耳但令兄免薩有何恨棘妻許

又寄語囑棘君當門戶豈可委罪小郎且大家臨亡以小郎屬君竟未妻娶家道不立君已有二兒死復何恨岱依事表上世祖詔曰棘薩毗隸節行可甄特原罪州加辟命并賜帛二十疋

袁察初名慙孫少好學有清才有欲與從兄顛婚者伯父洵謂顛父曰顛不堪可與慙孫婚爾時慙孫在坐流涕起出早以特立志行見知

孫謙少客居歷陽躬耕以養弟妹鄉里稱其敦睦江夏

王羲恭聞之引為行叅軍

南齊劉璡兄璡夜隔壁呼璡共語璡不答方下牀著衣然後立應璡問其久璡曰向東帶未竟其力操如此叅大司馬軍事射聲校尉卒官

辛普明僑居會稽少與兄共處一帳兄亡以帳施靈座夏月多蚊普明不以露寢見色豫章王辟為議曹從事陶子鏘字海育兄尚宋末為倖臣所怨被繫子鏘公私披訴流血稽顙行路嗟傷逢謝超宗下車相訪迴入縣

詣建康令勞彥遠曰豈忍見人昆季如此而不留心勞感之兄得釋

公孫僧遠以伯弟亡無以葬身販貼與鄰里供斂送之費躬負土種松柏兄姊未婚嫁乃自賣為之成禮太祖即遣兼散騎常侍

解仲恭鴈門人僑居南郡家行敦睦得纖毫財利輒與兄弟平分史不載仕官

吳欣之晉陵利城人也宋元嘉末弟周之為武進縣成

隨王誕起義太祖遣軍主華欽討之吏皆散周之獨留見執將死欣之詣欽乞代弟命辭旨哀切兄弟皆見釋史不載仕官

吳達之義興人也從祖弟敬伯夫妻荒年被略賣江北達之有田十畝貨以贖之與之同財共宅郡命敬伯為主簿固以讓兄又讓世業舊田與族弟弟不受田遂閒廢史不載仕官

陸澄弟鮮得罪當死澄於路見舍人王道隆叩頭流血

以此見原轉光祿大夫加散騎常侍未拜卒

胡諧之為太子中庶子兄謨之亡上表乞解所職詔不許

劉繪字士車太常悛之弟事悛恭謹與人語呼為使君
隆昌中悛坐罪將見誅繪伏闕請代兄死高宗輔政救
解之引為鎮軍長史及悛之亡朝議贈平北將軍雍州
刺史詔書已出繪請尚書令徐孝嗣改之

劉濂兄颯南陽人事繼母有行弟濂事颯亦謹

王思遠為建安內史長兄思玄卒思遠友于甚至表乞解不許及祥日又固陳世祖乃許之

謝淪為吏部尚書領右軍將軍兄肱在吳興論啟公事稽晚淪乃代肱為啟上知非肱手迹被問見原

王微字景玄初為始興王友父憂去職服闋除南平王鑠右軍諮議叅軍仍為中書侍郎時兄遠免官歷年微歎曰我兄無事而屏廢我何得而叨忝踰分文帝即以遠為光祿勳

王瑒字子璵遷尚書左僕射加侍中參選事瑒居家篤睦每歲時饋遺徧及近親敦友諸弟稟其規訓

南齊張敬兒南陽冠軍人也弟恭兒位正員郎謝病歸本縣嘗居上村不肯出仕與居人不異與敬兒愛友甚篤及聞敬兒敗走入蠻後首出原其罪

劉峻字孝標本名法武梁天監初召入西省與學士賀蹤典較祕閣峻兄孝慶時為青州刺史峻請假省之

劉之亨字嘉會之亨美績嘉聲在朱异之右既不協懼

為所害故求出之以代兄之遴為安西王繹長史南郡太守上問朱异曰之亨代兄嘉不曰兄弟因循豈直大馮小馮而已

梁傅昭字茂遠北地靈州人也弟映字微遠三歲而孤昭映兄弟友睦修身厲行非禮不行映有文才褚彥回聞而悅之乃屈與子賁等遊處年未弱冠彥回欲令仕映以昭未解褐固辭須昭仕乃就官天監初為烏程令所受俸祿悉歸於兄後昭守臨海陸倕餞之賓主俱歡

日昏不反映以昭年高不可連夜極樂乃自往迎候同乘而歸兄弟竝已班白時人美而服焉及昭卒映喪之如父年踰七十哀感過禮服制雖除每言輒感慟

韋放性弘厚篤實輕財好施於諸弟尤雍穆每將遠別及行後初還嘗同一室卧起時號為三姜

庾於陵弟肩吾八歲能為詩特為兄所友悌於陵鴻臚卿鎮荊州大中正卒肩吾終度支尚書

韋叡性慈愛撫孤兒子過於己子遷侍中給事中未拜

而卒

何點兄求隱居吳郡虎丘山求卒點菜食不飲酒訖于
三年腰帶減半徵侍中辭疾不赴

何伯璵弟幼璵俱厲節撫養孤兄子及長為婚推家業
盡與之而貧瘁枯槁誨人不倦鄉里呼為人師郡守下
車莫不修謁史不載仕官

江革濟陽人九歲丁父艱與弟觀同生少孤貧傍無師
友兄弟自相訓勗讀書精力不倦後革為尚書駕部郎

中建安王為雍州刺史表求管記以革為征北記室參
軍帶中盧令革與弟觀少長共居不忍離別苦求同行
乃以觀為征北行參軍兼記室

陳虞荔為太子中庶子時荔第二弟寄寓於閩中依陳
寶應荔每言之輒流涕文帝哀而謂曰我亦有弟在遠
此情甚切他人豈知乃勅寶應求寄寶應不遣荔因以
感疾寄自流寓南土與兄荔隔絕亦感氣疾每得荔書
氣輒奔劇危殆者數矣

徐伯陽為新安諮議叅軍聞妹喪發疾而卒

顧野王弟充國早卒野王撫養孤幼恩義甚厚仕至黃門侍郎光祿卿

江德操字德操父革梁度支尚書德操性至孝事親盡禮與異產昆弟居恩惠甚篤拜鎮遠將軍通直散騎常侍自求宰縣出新喻令卒官

殷不害字長卿陳郡長平人也家世儉約居甚貧窶有弟五人皆幼養小弟無所不至士大夫以篤稱之終光

祿大夫

張悌建康人家貧無以供養以情告鄰富人富人不與不勝忿遂結四人作劫所得物三劫持去寔無一錢入已縣抵悌死罪兄松訴稱與弟景是前母子後母子惟悌松長不能教誨乞代悌死景又曰松是嫡長後母惟生悌若從法母亦不全亦請死母憂云悌應死豈以弟罪枉及諸兄悌亦引分兩全兄弟供養縣以上讞帝以為孝義特降死後不得為例

冊府元龜卷八百五十一

欽定四庫全書

冊府元龜卷八百五十二 宋 王欽若等撰

總錄部

友悌第二

後魏李祐字長禧篤穆友于稱於世

李產之字孫僑容貌短陋而撫訓諸弟愛友篤至

寇治為征虜將軍兄弟並孝友篤穆白首同居

陸凱景明初咸陽王禧謀逆凱兄琇陷罪凱亦被收遇

赦乃免凱痛兄之死哭無時節目幾失明訴冤不已備盡人事至正始初宣武復琇官爵凱大喜置酒集諸親曰吾所以數年之抱疾忍死者顧門戶計耳逝者不追今中願畢矣遂以其年卒

房景伯性淳和涉獵經史諸弟宗之如事嚴親及弟妹亡蔬食終喪碁不內御憂毀之容有如居重其次弟景先先亡其幼弟景遠碁年哭臨亦不內御鄉里為之語曰有義有禮房家兄弟景先沈敏方正事兄恭謹出告

反面晨昏參省側立移時兄亦危坐相敬如對賓客兄

曾寢疾景先侍湯藥衣冠不解形容毀瘁親友見者莫

不哀之

崔光韶好標榜人物無所推尚每云景伯居喪不食鹽菜因此遂為永病積年不愈

裴修字元寄早孤二弟三妹並在幼弱撫養訓誨甚有道方次第矜早喪修哀傷之感於行路愛育孤姪同於已子及將異居奴婢田宅悉推與之時人以此稱之

李冲兄弟六人四母所出頗相忿鬪及冲貴封祿恩賜皆以共之內外輯睦父亡後同居二十餘年至雒乃別

弟宅更相友愛久無間然皆冲之德也始冲見私寵也
兄子韶嘗有憂色慮致傾敗後榮名日顯稍乃自安終
左僕射

李瑒與弟謚特相友愛謚在鄉物故瑒慟哭絕氣久而
方蘇不食數日暮年之中形骸毀悴人俱哀歎之仕至
鎮遠將軍岐州刺史

楊播家世純厚並敦義讓昆季相事有如父子播剛毅
弟椿津恭謙與人言自稱名字兄弟旦則聚於廳堂終

日相對未曾入內有一美味不集不食廳堂間往往幃
幔隔障為寢息之所時就休偃還共談笑椿年老曾他
處醉歸扶持還室仍假寐閣前承候安不椿津年過六
十並登台鼎而津常旦暮叅問子姪羅列階下椿不命
坐津不敢坐椿每近出或日斜不至津不先飯椿還然
後共食食則津親授匙筋味皆先嘗椿命食然後食津
為司空於時府主皆引寮佐人就津求官津曰此事須
家兄裁之何為見問初津為肆州椿在京宅每有四時

嘉味輒因使次附之若或未寄不先入口椿每得所寄輒對之下泣

甄琛為侍中領御史尉坐朋黨免官與弟僧林誓同居以沒齒

張烈為瀛州刺史更滿還朝因辭老還鄉里兄弟同居怡怡然為親類所慕

韓子熙少孤為叔顯宗所撫養及顯宗卒子伯華又幼子熙友愛等於同生長猶共居車馬資財隨其費用未

嘗見於顏色又上書求析階與伯華於是除伯華東太原太守及伯華在郡為刺史元弼所辱子熙乃泣訴朝廷孝明詔案驗弼遂大見詰讓

李郁字永穆為通直散騎常侍建義中以兄瑒卒遂撫育孤姪歸於鄉里

邢晏篤於義讓初為南兗州刺史例得一子解褐乃啓其孤弟子慎為奉朝請子慎年甫十二而其子已弱冠矣後為滄州復啓孤兄子昕為府主簿而其子並未

從官世人以此多之

房亮為荊州刺史時邊州刺史例得一子出身亮不言其子而啓弟子超為奉朝請議者稱之

高恭之字道穆幼孤事兄如父母

孫紹兄世元早卒世元善彈箏紹後聞箏聲便涕泗嗚咽捨之而去世以此尚之卒於左衛將軍右光祿大夫裴敬憲學博才清諸府辟命先進其弟世人歎美之

吳悉達兄弟同居四十餘載閨門和睦讓逸競勞史不

載仕宦

閻元明昆弟雍和尊卑諧穆安貧樂道白首同歸史不載仕宦

宋世景為滎陽太守友于之性過絕於人兄道輿死哭之哀切酸感行路形容毀悴見者莫不歎慙

北齊魏蘭根以西魏武帝太昌初除儀同三司封鉅鹿縣侯邑七百戶啓授兄子同達

高隆之以西魏文帝時為荊州刺史封平原郡公邑一

千七百戶隆之請減戶七百並求降已四階讓兄騰並優詔許之

崔陵以文宣天保初降侍中監起居以禪代之際叅掌儀禮別封新豐縣男邑二百戶迴授第九弟隆之封隆之為侍中封安德郡公邑二千戶隆之表以先爵富城子及武城子轉授弟子孝琬等朝廷嘉而從之

李庶訴魏收為史不直為楊愔所譖死於臨漳獄中庶兄岳痛之終身不歷臨漳縣門

司馬子如為司空事姊有禮撫諸兄子慈篤當時名士
並加欽愛以此稱之子如別封須昌縣公迴授兄子膺
之

高昂天平初除侍中司空公昂以兄乾薨於此位固辭
不拜轉司徒公

楊愔為神武行臺右丞愔從兄幼卿為岐州刺史以直
言忤旨見誅愔聞之悲懼因哀感發疾

陸卬為中書侍郎遭母喪哀慕毀悴殆不勝喪至沈篤

頓昧伏枕又盛風疾第五弟博遇疾臨終謂其兄弟曰
大兄尪病如此其性至慈博之死日必不得使大兄知
之哭泣聲必不可聞徹致有感慟家人至於祖載方始
告之邛聞而悲痛一慟便絕

陸彥師為彭城王浹東閣祭酒兄邛當襲父始平侯以
彥師兄弟中最幼表讓封焉彥師固辭而止時稱友悌
孝義總萃一門

後周李穆為小冢宰別封一子為縣伯穆迴請封兄賢

子孝軌許之及兄子植謀害宇文護事泄當誅植弟基當從戮穆求以子惇怡等代死辭理酸切聞者莫不動容護矜之遂特免基死

隋薛濬開皇初為考功侍郎丁母艱不勝喪病且卒其弟謨時為晉王兵曹叅軍事在揚州濬遺書與謨曰吾以不造幼丁艱酷窮遊約處屢絕簞瓢晚生早孤不聞詩禮賴奉先人貽厥之訓獲稟母氏聖善之規負笈裹糧不憚艱遠從師就業欲罷不能砥行礪心因而彌篤

服膺教義爰至長成自釋耒登朝于茲二十三年矣雖
官非聞達而祿喜連親庶保期頤得終色養何圖精誠
無感禍酷荐臻兄弟俱被奪情苦廬靡申哀訴是用扣
心泣血實氣摧魂者也既而創巨釁深不勝荼毒啓手
啓足幸及全歸使夫死而有知得從先人於地下矣豈
非至願哉但念爾伶俜孤宦遠在邊服顧此恨恨如何
可言適已有書冀得與汝面訣忍死待汝已歷一旬汝
既未來便成今古緬然永別為恨何言勉之哉勉之哉

書成已絕

郎方貴淮南人少有志尚與從父弟雙貴同居開皇中
方貴嘗因出行遇雨淮水汎漲於津所寄渡船人怒之
搗方貴臂折至其家弟雙貴驚問所繇方貴具言雙貴
恚恨遂向津毆擊船人致死守津者執送之縣官案問
其狀以方貴為首當死雙貴從坐當流兄弟二人爭為
坐首縣司不能斷送詣州兄弟各引咎州不能定二人
爭欲赴水而州狀以聞帝聞而異之特原其罪表其門

間賜物百段後為州主簿

裴子通開皇中為大中大夫兄弟八人以友愛著名
牛弘為右光祿大夫有弟曰弼好酒而酗嘗因醉射殺
弘駕車牛弘來還宅其妻迎謂之曰叔射殺牛矣弘聞
之無所怪又問直云作脯坐定其妻又曰叔忽射殺牛
大是異事弘曰已知之矣顏色自若讀書不輟其和寬
如此

韋世康性孝友初以諸弟位並隆貴獨季弟世約官塗

不達共推父時田宅盡以與之世多其義官至吏部尚書荊州總管

元褒便弓馬少有成人之量年十歲而孤為諸兄所鞠養性友悌善事諸兄諸兄欲別居褒泣諫不得家素富多金寶褒無所受脫身而出為州里所稱煬帝即位拜濟州刺史

楊素字處道其異母弟約性沈靜內多譎詐好學彊記素友愛之凡有所為必先籌於約而後行之素為司徒

封楚公

唐高士廉妹先適隋右驍騎將軍河南長孫晟生子無忌及一女即文德皇后也既而晟卒士廉迎妹及諸甥於家情禮甚至後仕隋為通事舍人坐事謫為交趾朱鳶縣主簿時行資不給又念妹無所庇賣其大宅買小宅以處之分其餘價輕裝而去其友愛如此

李知本趙州元氏人與弟知隱甚稱雍穆子孫百餘口財物僮僕纖毫無間隋末盜賊過其閭而不入自相誠

曰無犯義門知本貞觀中官至夏津令知隱至伊闕丞
魏徵以修定五禮當一子為縣男請讓孤兄子叔慈太
宗愴然曰卿之此心可以勵俗遂許之徵官至左光祿
大夫封鄭國公

趙弘智貞觀中累遷黃門侍郎兼弘文館學士以疾出
為萊州刺史弘智事兄弘安同於事父所得祿俸未嘗
入於私室及兄卒哀毀過禮事寡嫂甚謹撫孤姪以慈
愛稱

虞世南為起居舍人兄世基為內史侍郎將被誅世南抱持號泣請以身代字文化及不納因哀毀骨立時人稱焉

李勣為司空與弟弼特相友愛

岑文本為中書令既久樞揆當塗任事賞錫稠疊凡有財物出入皆李弟文昭一無所問文昭待任校書郎多與時人遊款太宗聞而不悅嘗從容謂文本曰卿弟過爾多交結恐累卿朕將出之為外如何文本泣曰臣弟

少孤老母特所鍾念不欲信宿離於左右令出外母必
憂悴儻無此弟亦無老母也因歔歔嗚咽太宗愍其意
而止雖召見文昭嚴加誠約亦卒無愆過又弟子長倩
少孤為文本所鞠養同於己子

顏相時為禮部侍郎性仁友兄師古卒不勝哀慕而卒
裴守真絳州稷山人早孤事母至孝母終事寡姊及兄
甚謹閨門禮則士友所推永淳初為乾封尉屬關中大
饑守真盡以祿俸供姊及諸甥身及妻子麤糲不充而

無倦色

程務挺為左驍衛大將軍則天臨朝累受賞賜特拜其子齊之為尚乘奉御務挺泣請迴授其弟則天嘉之下制褒美乃拜其弟原州司務挺終為太子洗馬

蘇味道則天時再為鳳閣侍郎同鳳閣鸞臺三品與其弟太子洗馬味玄甚友愛味玄若請托不諧輒面加凌折味道怡然對之不以為忤論者稱焉

崔玄暉與弟昇交相友愛至於親族子弟孤貧者亦多

躬自撫養教授頗為當時所稱終中書令博陵郡王
豆盧欽望作相兩朝不能有所規正然於諸弟姪當代
稱友愛

李暉與兄昇弟暈甚相篤睦昇等每月自東都省暉往
來微行州人未嘗覺之其清慎如此卒太子太傅

蘇頲為相所得俸祿盡推與諸弟或散之親族家無餘
資終禮部尚書

張嘉貞為并州長史開元初因奏事至京師玄宗聞其

善政數嘗慰嘉貞因奏曰臣少孤兄弟相依以至今日
臣弟嘉祐今授鄧州別駕與臣各在一方同心離居魂
絕萬里乞移就臣側近臣兄弟盡力報國死無所恨帝
嘉其友愛特改嘉祐為忻州刺史

陸南金開元初為奉禮郎太常少卿盧崇道犯罪流嶺
表逃歸來都南金哀而納之崇道俄為讐人所發侍御
史王旭按其事遂捕獲崇道連引南金旭遂繩以重法
南金弟趙璧詣旭自言藏崇道請代兄死南金固稱弟

實自誣身請當罪兄弟讓死旭怪而問其故趙璧曰兄是長嫡又能幹家事亡母未葬小妹未嫁自惟幼劣生無所益身自請死旭遂列上狀玄宗嘉其友義並特宥之南金繇是大知名

王維與弟縉閨門友悌多士推之維為給事中祿山陷西京維偽授給事中及至德二年冬復西京維付吏議維弟縉時為刑部侍郎太原少尹抗表請以己官爵贖兄之罪特為減等

李瀾為徐州蘄縣令時東都未平梁宋間羣盜連聚或至二千餘衆攻陷城邑瀾守蘄縣力屈為盜所執將害之瀾弟渤詣盜請代兄死瀾又請殺身留弟兄弟爭死俱為盜害瀾女原武尉盧甫妻也見父被執號泣請代死亦為盜所害至代宗永泰元年追贈瀾并渤等官第五琦京兆長安人也少孤事兄華敬順過人再入為太子賓客卒

王遇常州民也弟遐廣德中並為海賊所擒賊將捨一

人兄弟相讓以死賊感義俱釋之

孫成為長安令兄宿典華州以火災驚致瘖疾成素孝
悌蒼黃請不待命陳之執政奔省於兄代宗聞之歎曰
急難之切觀過知仁矣

郭曜尚父子儀長子天性孝友為太子少保子儀薨曜
遵命以四朝所賜名馬重寶悉皆上獻德宗復賜之曜
乃散諸昆季

李承幼孤鞠於兄華之手既長事兄以孝聞後終湖南

觀察使

盧邁少以孝友謹愿稱為中書侍郎平章事從父弟起為劍南西川判官卒於成都及歸葬雒陽路出於長安城東邁素友愛遂奏請至城東哭於其柩許之近代宰臣多自以為崇重五服之親或不過從弔臨邁獨請臨弟喪士君子是之

韋倫為太子少師居家孝友撫弟姪以敬愛稱之

陽城孝友不忍其弟異處皆不娶妾侍終身有寡妹依

城以居有甥年十三餘癡不能如人嘗與其弟負之以游初城之妹夫客死他處家貧不能葬城親與其二弟舁屍以歸葬於其居之側往返千餘里後為諫議大夫穆寧以秘書監致仕事寡姊以弟聞名

崔衍為宣歙池等州觀察使衍繼母李氏不慈於衍李氏所生子邵每多取子母錢使其子以契書徵負子衍歲為償之故衍官至江州刺史而妻子衣食無所餘

李元素為戶部尚書判度支元素少孤弱長事姊友敬加

於人及其姊沒沈悲邁疾上疏懇辭職從之

田興為魏博節度其兄融為博州刺史興幼孤睦友而
教道之及興之節制六州請融為支郡守朝廷察其切
誠不忍離其兄也故特授焉

李遜幼孤寓居江陵與其弟建能安貧苦易衣併食講
習不倦遜兄造知二弟賢為營丐以成其志業弟兄同
致休顯士以此多之

嚴綬為檢校司徒兼太子少傅卒於家綬材器不逾常

品事兄嫂過謹為人所稱

韋顓字周仁太子太師見素之孫也生一歲而孤事姊稱恭孝終吏部侍郎

杜式方司徒佑之子性孝友兄弟尤睦季弟從郁少多疾病式方每躬自煎調藥膳水飲非經式方之手不入於口及從郁夫喪終經年號泣殆不勝情士頗多之官終桂管觀察使

韋夏卿喜愠不形於色撫孤姪恩踰己子卒太子少保

白居易友愛過人兄弟相待如賓客弟行簡子龜兒多
自教習以至成名當時友悌無以比焉官終刑部尚書
王起為尚書左丞居兄播之喪號毀過禮友悌尤至
薛膺散騎常侍致仕革之子弟齊中飛矢墜於城下膺
時為左補闕聞難不及請告馳馬以赴齊歿膺與弟褒
庠處喪如禮朝之卿大夫暨縉紳者徃弔繼路聞其哀
號弔者悲不能自持膺去左補闕庠去河南縣尉直弘
文館與褒皆屏居外野布巾終喪蹈名教者推之

梁張文慰為中書侍郎平章事居家孝悌其弟濟美早
得心恙文慰撫視殆三十年士君子稱之

杜曉以宰相判鹽鐵兄光人有心疹厥候每作或溢喙
縱詬或揮挺追撲曉事之愈恭未嘗一日少殆

李珽性孝友與弟琪有敦睦之愛為縉紳所稱仕至右
散騎常侍

晉張仁愿為大理卿兄仁穎梁朝仕至諸衛將軍中風
恙十餘年仁愿事之出告反面如嚴父焉士大夫推為


孝友兄卒人弔之淚流滿目而辭氣頓絕見者傷之

漢李濤仕晉為中書舍人弟濟為翰林學士對掌綸誥咸以為榮濟後陷虜濤每見人自虜中來者必對之慟哭有友于之義也

劉鼎善交遊能譚笑居家仁孝異母昆仲凡七人撫之如一乾祐初拜諫議大夫

周王珽字世美鄭州人多仁義重然諾撫家雍睦初與弟廷規同過河南累從藩職所置田宅物產皆弟主之

一無所伺歷工禮刑三部尚書



冊府元龜卷八百五十二

欽定四庫全書

子部

冊府元龜卷八百五十三

六

詳校官中書_臣孫球

侍讀_臣孫球覆勘

總校官庶吉士_臣何思鈞

校對官助教_臣汪錫魁

謄錄監生_臣李克文

欽定四庫全書

冊府元龜卷八百五十三

宋王欽若等撰

總錄部

姻好

周禮媒氏掌萬民之判蓋以合二姓之好正三綱之倫
上以奉宗祖下以昭嗣續中古三十而娶二十而嫁所
以參天地之數也仲春之會三星之期所以順陰陽之
序也乃至始冠而成室既笄而言歸示為父端表適人

之道三代以降六禮具舉冕迎不以為重廟見必主於
肅御輪奠鴈其儀克恭施於結褵所戒尤慎故曰壻之
父為婚婦之父為姻人倫之本莫斯為大亦有知賢而
可妻貴德而忘醜靡取高援自成嘉樹是則標梅之詠
于以及時鳴鳳之占用昌厥後者矣

晉重耳奔狄伐廐咎如狄之醜姓得二女以長女妻重耳生

伯儵叔劉以少女妻趙衰生盾

陳懿氏卜妻敬仲懿氏陳大夫龜曰卜其妻占之曰懿氏妻是謂鳳

凰于飛和鳴鏘鏘雄曰鳳雌曰凰雄雌俱飛相和而鳴鏘鏘然猶敬仲夫妻相和適齊有聲

譽有媯之後將育子姜媯陳姓姜齊姓五世其昌並於正卿八

世之後莫之與京

齊棠公之妻東郭偃之姊也棠公齊棠邑大夫東郭偃臣崔武

子棠公死武子見棠姜而美之美其色也使偃取之為已取也偃

曰男女辨姓辨別也今君出自丁齊丁公崔杼之祖臣出自桓不

可齊桓公小白東郭偃之祖同姜姓故不可昏武子筮之遇困坎下兌上困之

大過巽下兌上大過六三變為大過史皆曰吉阿崔子示陳文子文子

曰夫從風

坎為中男故夫變而為巽曰從風

風隕妻不可娶也

風能隕落物者

變而隕落故曰妻不可取

且其繇曰困于石據于蒺藜入于其宮不

見其妻凶

困之文辭

困于石往不濟也

坎為險為水水之險也石不可以動據

于蒺藜所恃傷也

坎為險兌為澤澤之生物而險者蒺藜恃之則傷

入于其宮

不見其妻凶無所歸也

易曰非所困而困名必辱非所據而據身必危遇此爻既辱且

危死其將至妻其可得見耶今卜昏而喪其妻三失位無應則失其所歸也

崔子曰娶也何

害先夫當之矣

寡婦曰娶言崇公已當此凶

遂取之

董叔將娶於范氏叔向曰范氏富盍已乎曰欲為繫援

焉繫援欲自結連於大援也他日范祁愬之於范獻子祁董叔之妻獻子之妹范

姓祁名曰不敬吾也獻子執而紡於庭之槐紡猶懸也懸於庭之槐也

叔向過之曰子盍為我請乎叔向曰求繫既繫矣求援既援矣欲而得之又何請焉

楚昭王之奔鄭鍾建負季芊以逃王將嫁季芊辭曰所以為女子遠丈夫也鍾建負我矣以妻鍾建

周劉氏晉范氏世為婚姻劉氏周卿士范氏晉大夫

晉悼公子愨亡在衛使其女僕而田僕御田獵大叔懿子止

而飲之酒

懿子大叔儀之孫

遂聘之生悼子

悼子大叔疾

公冶長字子長齊人孔子曰長可妻也雖在縲紲之中

縲黑索也繼孿也所以拘罪人

非其罪也以其子妻之

南宮适字子容孔子曰君子哉若人尚德哉若人賤不義而

貴德故曰君子

國有道不廢

不廢言見用

國無道免於刑戮三復白

珪之玷

詩曰白珪之玷尚可磨也斯言之玷不可為也南容讀詩至此三反之是其心敬慎於言以

其兄之子妻之

漢張耳嘗亡命遊外黃

命者名也凡言亡命謂脫其名籍而逃亡

外黃富人

女甚美庸奴其夫

言不恃賴其夫視之若庸奴

亡郎父客

父時故賓客也郎歸

也父客謂曰必欲求賢夫從張耳女聽為請決嫁之請

絕於前夫而嫁於耳

女家厚奉給耳耳以故致千里客官為外黃令

陳餘遊趙苦陘富人公乘氏以其女妻之

陳平陽武戶牖人

陽武縣名屬陳留戶牖者其鄉名

少時家貧及長可

娶婦富人莫與者貧者平亦媿之久之戶牖富人張負

有女孫五嫁夫輒死人莫敢取平欲得之邑中有大喪

平家貧侍喪以先往後罷為助張負既見之喪所獨視

偉平

視而悅其奇偉

平亦以故後去負隨平至其家廼負郭窮

巷

負請借也

以蓆為門然門外多長者車轍張負歸謂其子

仲曰吾欲以女與陳平仲曰平貧不事事

不事產業之事

一縣

中盡笑其所為獨奈何予之女負曰固有美如陳平長

貧者乎卒與女為平貧廼假貸幣以聘予酒肉之資以

內婦負戒其孫曰毋以貧故事人不謹事兄伯如事廼

父事嫂如事廼母平既取張氏女資用益饒游道日廣

黥布為羣盜陳勝之起也布乃見番君其衆數千人番

君以女妻之

公孫賀自武帝為太子時賀為舍人及武帝即位遷至太僕賀夫人君孺衛皇后姊也

鮑宣妻者桓氏之女也字少君宣嘗就少君父學父奇其清苦故以女妻之裝送資賄甚厚

鄭宗字子游本高密大族世與王家相嫁娶

女嫁王家男又娶也

張放得幸於成帝放取皇后弟平恩侯許家女帝為放供帳賜甲第充以乘輿服飾時號為天子娶婦皇后嫁

女

翟宣者方進之子襲封高陵侯王莽秉政春陵侯敞與安衆侯崇竝漢之宗室見莽將危漢室謀舉兵及崇事

敗敞懼欲結援樹黨乃為子祉娶宣女為妻東觀日記敞為嫡子

祉娶宣女習為宣妻使嫡子憚送入女門二十餘日義兵起也會宣義弟起兵欲攻莽

南陽捕殺宣女祉坐繫獄敞因上書謝罪

後漢京兆摯恂以儒學教授馬融從其游學恂奇融才

以女妻之

鍾皓兒子瑾母李膺之姑也膺祖太尉修嘗言瑾似我
家性邦有道不廢邦無道免於刑戮復以膺妹妻之

公孫瓚遼西人也以母賤遂為小吏為人美姿貌大音

聲言事辯慧

畧曰瓚性辯慧每日常兼數曹無有忘誤

太守竒其才以女

妻之

侯太守妻之以女

陶謙父故餘姚長謙少孤始以不羈聞於縣中年十四
猶綴帛為幡乘竹馬而戲邑中兒童皆隨之故蒼梧太
守同縣甘公出遇之塗見其容貌異而呼之與語甚悅

許妻以女甘公夫人聞而怒曰妾聞陶家兒遨戲無度如何以女許之甘公曰彼有奇表長必大成遂以女妻之

荀彗妻司馬景王文王之妹也二王皆與親善

張魯降曹公曹公為子彭祖娶魯女

魏荀彧父緄為濟南相緄畏憚宦官乃為彧娶中常侍

唐衡女典略曰衡欲以女妻汝南傅公明公明不取轉以妻彧也彧以少有才名故

得免於譏議

王粲與族兄凱俱避地荊州劉表欲以女妻粲而嫌其形陋而用率以凱有風貌乃以妻凱也

高慎字孝甫敦厚少華有沈深之量撫育兄孤子五人恩義甚篤瑯琊相何英嘉其履行以女妻焉

蜀費賓伯名觀江夏郾人也劉璋母乃觀之族姑璋又以女妻觀

黃承彥者高爽開列為沔南名士謂諸葛孔明曰聞君擇婦身有醜女黃頭黑色而才堪相配孔明許即載送

之時人以為笑樂鄉里為之諺曰莫作孔明擇婦正得阿彥醜女

謝援有名行太尉皇甫嵩賢其才而以女妻之丞相諸葛亮以援為祭酒

吳張昭長子承喪妻昭欲為索諸葛瑾女承以相與有好難之大帝聞而勸焉遂為婚

周瑜為中護軍從孫策攻皖拔之時得橋公兩女皆國色也策自納大橋瑜納小橋

江表傳曰策從容戲瑜曰橋公二女雖流離得吾二

人作壻亦
足為歡

潘翥字文龍拜騎都尉後代領兵早卒翥弟祕大帝以
姊陳氏女妻之調湘鄉令

呂範字子衡汝南細陽人少為縣吏有容觀姿貌邑人
劉氏家富女美範求之母嫌欲勿與劉氏曰觀呂子衡
寧為久貧者邪遂為婚

晉羊祜博學能屬文身長七尺三寸美鬚眉善論郡將
夏侯威異之以兄霸之女妻焉

郭淮弟配字仲南有重名位至城陽太守裴秀賈充皆配女壻

于展字泰舒有器度幹用歷職著績終於太僕次弟預字泰寧相國叅軍知名早卒女適王衍配弟鎮字季南謁者僕射鎮字奕字泰業山濤啓事稱奕高簡有雅量歷位雍州刺史尚書

鄧攸嘗詣鎮軍賈混以人訟事示攸使決之攸不視曰孔子稱聽訟吾猶人也必也使無訟乎混竒之以女妻

馬

張華少孤貧鄉人劉放竒其才以女妻焉

劉殷新興人也郡命主簿州辟從事皆以供養無主辭
不赴命司空齊王攸辟為掾征南將軍羊祐召參軍事
皆以疾辭同郡張宣子識達之士也勸殷就徵殷曰當
今二公有晉之棟楹也吾方希達如椽椽爾不憑之豈
能立乎吾今王母在堂既應他命無容不竭盡臣禮便
不得就養子輿所以辭齊大夫良以色養無主故爾宣

子曰如子所言豈庸人所識哉而今而後吾子當為吾師矣遂以女妻之張宣子者并州豪族也家富於財其妻怒曰我女年始十四姿識如此何慮不得為公侯妃而遽以妻劉殷乎宣子曰非爾所及也誠其女曰劉殷至孝冥感兼才識超世此人終當遠達為世名公汝其謹事之張氏性亦婉順事王母以孝聞奉殷如君父焉孫晷以會稽虞喜隱居海嵎有高世之風晷欽其德聘喜弟預女為妻喜戒女棄華尚素與晷同志時人號為

梁鴻夫婦

劉遐廣平人性果毅勇壯值天下大亂遐為場主鄉人冀州刺史邵續深器之以女妻焉

衛玠為太子洗馬懷帝時以天下大亂扶輿母至江夏玠妻先亡征南將軍山簡敬之甚相欽重簡曰昔戴叔鸞嫁女唯賢是與不問貴賤况衛氏權貴門戶令望之人材於是以妻焉

管彥者王裒同鄉人少有才而未知名裒獨以為必當

自拔達而友之男女各始生使共許為婚彥後為西夷
校尉卒而葬於雒陽裒後便嫁其女彥弟馥問裒裒曰
吾薄志畢願山藪昔嫁姊妹皆遠吉凶斷絕每以此自
誓今賢兄子葬父於雒陽此則京邑之人也豈吾結好
之本意哉馥曰嫂齊也當還臨淄裒曰安有葬父河南
隨母還齊用意如此何婚之有

王育少勤學同郡許子章嘉之以兄之子妻之為立別
宅分之資產育受之無愧色

周浚有人倫鑒識鄉人史曜素微賤衆所未知浚後獨引之為友遂以妹妻之曜竟有名於世

王羲之司徒導之從子時太尉郝鑒使門生求女壻於導導令就東廂徧觀子弟門生歸謂鑒曰王氏諸少年並佳然聞信至咸自矜持惟一人在東牀坦腹食胡餅獨若不聞鑒曰正此佳壻邪訪之乃羲之也遂以女妻之

葛洪尤好神仙導養之法師事南海太守上黨鮑玄玄

亦內學逆占將來見洪深重之以女妻洪洪傳曰玄業
兼綜練醫術

戴逵性不樂當世嘗以琴書自娛師事徵士范宣於豫
章宣異之以兄女妻焉

前秦韋羅為丞相王猛所器重以女妻焉

南燕慕容超子初為符昌收納及德諸子皆誅之獄掾
呼延平救護之得逃去其後超母謂超曰吾母子全濟
呼延氏之力乎今欲為汝納其女以答厚惠於是娶之

宋殷景仁少有大成之量司徒王謚見而以女妻之

蔡興宗妻劉氏早卒一女甚幼外甥袁顓始生子彖而妻劉氏亦亡興宗姊即顓母也一孫一姪躬自撫養年齒相比欲為婚姻每見興宗輒言此意大明初詔興宗女與南平王敬猷婚興宗以姊生平之懷屢經陳啓荅曰鄉諸人欲各行己意則國家何繇得婚且姊言豈是不可違之處邪舊意既乖彖亦他娶其後彖家亦不終顓又禍敗彖等淪廢當時孤微理盡敬猷遇害興宗女

無子娶居名門高胄多欲結姻明帝亦勅適謝氏興宗並不許以女適豕

劉秀之少孤貧有志操東海何承天雅相知器以女妻之

杜驥初隨父南遷時北士舊法問疾必遣子弟驥年十三父使候同郡韋華華子玄有高名見而異之以女妻焉

蕭惠基父思話征西將軍儀同三司惠基幼以外戚見

江夏王義恭義恭歎其詳悉以女結婚解褐著作佐郎
南齊朱選之字處林有志節著辯相論幼時顧歡見而
異之以女妻焉

謝瀟莊之第五子也僕射褚淵聞瀟年少靖正以女結
婚厚為資送

梁韋放與吳郡張率皆有側室懷孕因指腹婚姻其後
各產男女未及成長而率卒遺嗣孤弱放嘗贍恤之為
北徐州時有勢族請姻者放曰吾不失信於故友乃以

息岐娶率女又以女適率子時稱放能篤舊

褚球少孤貧好學宋建平王景素元徽中誅滅唯有一女得存其故吏何昌寓王恩遠聞球清正以此女妻之因為之延譽

陳錢道戢字子韜吳興長城人也父量深漢壽令道戢少以孝行著聞及長頗有幹略徵時高祖以從妹妻焉周弘正年十歲通老子周易叔父捨異之河東裴子野深相賞納請以女妻之

孫瑒有鑒識男女婚姻皆擇素貴

徐浚子儉幼而修立勤學有志操汝南周弘直重其為人妻之以女

沈君理字仲倫吳興人也父巡素與高祖相善君理美風儀博涉經史有識鑒起家湘東王法曹叅軍高祖鎮南徐州巡遣君理自東陽詣高祖高祖器之命尚會稽長公主辟為府西曹掾稍遷中衛豫章王從事中郎

後魏公孫邃公孫叡為從兄弟而叡才器小寢而封愷

之甥崔浩之婿遂母鴈門李氏地望懸隔鉅鹿太守祖
季真多識北方人物每云士大夫當須好婚親二公孫
同堂兄弟爾吉凶會集便有士庶之異

李神儁喪二妻又欲娶鄭嚴祖妹神儁之從甥也盧元
明亦將為婚遂至紛競二家閱於嚴祖之門鄭卒歸元
明神儁惆悵不已時人謂神儁鳳德之衰

陸麗子獻母本恭宗宮人以賜麗生獻襲爵撫軍大將
軍平原王娶徐州刺史博陵崔鑒女鑒謂所親云平原

王才度不惡但恨其名姓殊為重復時高祖未改其姓
崔浩始弱冠太原郭逸以女妻之浩不曜華彩故時人
未知逸妻王氏宋鎮北將軍王仲德姊也母竒浩才能
自以為得壻俄而女亡王深以為傷恨復以少女繼婚
逸及親屬以為不可王固執與之逸不能違遂重結好
盧淵為侍中與僕射李冲相友善冲重淵門風而淵仰
冲才官故結為婚姻往來親密至於淵荷高祖意遇頗
亦繇冲

盧魯元為太保錄尚書事子統以父任侍東宮世祖以元舅陽平王杜超女南安長公主所生妻之車駕親自臨送大官設供具資以千計

劉昞年十四就博士郭瑀時瑀弟子五十餘人瑀有女始笄妙選良偶有心於昞遂別設一座前謂諸弟子曰吾有一女年向成長欲覓一快女婿誰坐此席者吾當婚焉昞遂奮衣來座神志湛然曰向聞先生欲求快婿昞其人也瑀遂以女妻之

鄭幼儒學修謹時望甚優丞相高陽王雍以女妻之

鄭義有文學弱冠舉秀才尚書李孝伯以女妻之後為
中山王叡傅是後歷年不轉資產亦乏因請假歸遂盤
桓不返及李冲貴寵與義姻好乃就家徵為中書令

甄琛為主客郎迎送梁使劉纘纘子晰為胸山戍主晰
死家屬入雒有女年未二十琛已六十餘矣乃納晰女
為妻婚日詔給厨費琛所好悅世宗時調之

崔休字惠盛少孤貧矯然自立尚書王凝欽其人望為

長子聘休姊贍以貨財繇是少振

茹皓為驍騎將軍有寵於世宗北海王詳以下咸憚之
皓為弟聘安豐王延明妹延明耻非舊流不許詳強勸
之云欲覓官如何茹皓婚姻也延明乃從焉

張宗之妻蕭思話弟之女蕭氏兄子超業後名彥幼隨
姑入國娶李供之女蕭賴其給贍以自濟

尉瑾少而敏悟好學慕善稍遷司直後司馬子如執政
瑾娶其外甥皮氏女繇此擢為中書舍人既是子如姻

戚數往叅詣因與先達名輩微相款狎

後周長孫澄字士亮魏太師稚之子年十歲司徒李瑛見之而竒之遂以女妻焉

盧柔性聰敏好學頗使酒誕節司徒臨淮王彧見而器之以女妻焉

韋孝寬行華山郡事屬侍中楊侃為大都督出鎮潼關引孝寬為司馬侃竒其才以女妻之

韋祐少好豪俠父沒事母兄以孝敬聞慕李長壽之為

人娶長壽女因寓居關南

隋蘇威初仕周為郡功曹大冢宰宇文護見而禮之以女妻焉

于顛字元武身長八尺美容貌鬚眉周大冢宰宇文護見而器之妻以季女

趙元淑性疎誕不治產業家徒壁立後數歲授驃騎將軍將之家無以自給時長安富人宗連家累千金仕周為三原令有季女惠而有色連獨竒之每求賢夫聞元

淑如是請與相見連有風儀美笑元淑亦異之及至其家服翫居處擬於將相酒酣奏女樂元淑所未見也元淑辭出連曰公子有暇可復來也後數日復造之宴樂更侈如此者再三因謂元淑曰知公子素貧老夫當相濟因問元淑所須盡買與之臨別元淑再拜致謝連復拜曰鄙人切不自量敬慕公子今有一女願為箕帚妾公子意何如元淑感愧遂聘為妻連復送奴婢二十口良馬十餘匹加以練帛錦綺及金寶珍玩元淑遂為富

人

蕭琮嫁從父妹於鉗耳氏揚素時為尚書令謂琮曰公帝王之族望高戚美何乃適妹鉗耳乎琮曰前以嫁妹於侯莫陳氏此復何疑素曰鉗耳羌也侯莫陳虜也何得相比素意以虜優羌琮曰以羌異虜未之前聞素慙而止

柳莊少有遠量博覽墳籍兼善辭令濟陽蔡大寶有重名於江左時為岳陽王蕭詧諮議見莊便歎曰襄陽水

鏡復在茲大寶遂以女妻之

虞世基幼沈靜有高才少傳徐陵聞其名召之世基不
往後因公會陵一見而奇之顧謂朝士曰當今潘陸也
因以弟女妻焉

唐武士彘武德中檢校右廂宿衛既喪妻高祖謂士彘
曰朕自為卿更擇嘉偶隨曰有納言遂寧公楊達英才
冠絕奕葉親賢今有女志行賢明可以輔德遂令桂楊
公主與楊家作婚主降勅結親庶事官給

柳亨為駕部郎中亨容貌魁偉高祖甚愛重之時以殿中監竇誕之女妻焉即高祖外孫也

呂諲蒲州河東人少修整勵志於學早孤家貧不能自振鄉人有程楚賓者家富於財遂娶其女楚賓與子震重其才給其所欲至天寶初舉進士調寧陵尉

張延賞中書令嘉貞之子也為左司禦率府兵曹叅軍博涉經史達於政事侍中韓國公苗晉卿見而竒之以女妻焉張孝忠為飛狐高陽二軍使成德軍節度使李寶臣以

孝忠謹直驍勇以其妻妹谷氏妻焉仍令悉統易州諸鎮前後十年威惠甚著

齊映大歷中為滑亳節度令孤彰掌書記彰疾甚令映草遺表因與謀後事映說彰令上表請代令子建歸京師彰然之因妻以女

李若初太府卿道謙之孫少孤貧初為轉運使劉晏下散職晏判官包佶察其勤幹以女妻之

揚於陵為潤州句容主簿時韓滉以節鎮于金陵滉剛

嚴少所接與獨於陵嘗所厚待因以女妻之

後唐鄭珣昭宗朝宰臣鄭啓之姪孫父徽光啓初為河南尹張全義判官全義子衍婚徽女珣以家世依張氏家于雒陽

孔循為滄州節度使初其女與宋王婚姻長興初乃奏今既封王私禮縣絕乞改就公禮

朱漢賓明宗初為右衛上將軍時樞密使安重誨方當委重漢賓密令結託得為婚家結除潞州節度使移鎮

晉州重誨既誅漢賓復為上將軍

李象字昭文深州樂壽人也父祖為農象少學有文性長於左氏春秋天成中以本科調舉不捷明年改應進士登上第宰臣劉昫愛其才以猶女妻之

任園世為京兆三原人祖清成都少尹考茂弘乾符末選授夏縣主簿避地太原西河令有子三人曰圖團罔雍睦有裕風彩俱異太祖愛之以宗女妻團因任圖代憲二郡守罔交城令

晉錢元瓘兩浙鏐第五子也起家為鹽鐵發運巡官表授上書金部郎中賜金紫許再思等為亂也宣州田頔要盟鏐逼召諸子問之曰誰能為吾為田氏之壻者俱有難色時元瓘年十六進步而對曰唯大王之命繇是就親於宣州三歲復焉

姚顛字伯真京兆萬年人也曾祖希齊湖州司功叅軍祖弘度蘇州刺史父荆國子祭酒顛少恣敦厚靡事容貌任其自然流輩未之重惟中條山司空圖唐季之名

士也深器之以女妻焉

冊府元龜卷八百五十三